

Io non poria zudegar *cum* certeza, perchè l'era molto scuro, et poteva esser che eramo uno tracto d'arco, quando l'andò a fondi, per quanto posso judicar al termine che la se atrovava, quando se partissimo, ma non l'ho visto. *Interrogatus*, ha pregato el comito che ti et gli altri debiano dir, che l'hanno tolto d'aqua in copano? *respondit*: El comito a mi non ha dicto cossa alcuna, perchè non me vol tropo ben, ma ben ho aldito che l'ha dicto a li altri compagni che eremo insieme: fradelli ve prego che, dapoì che havemo scapolado questa fortuna, vui debiate dir, che m'havè tolto d'aqua in copano, azò che io non sia incargado, et loro risposeno: sia *cum* Dio. *Relectum confirmavit*.

*Dicto die.*

Luca d'Antivari, era galioto *cum* la dicta galia, *cum* juramento *super ultram* examinato, *respondit*: La nocte che la nostra galia naufragò, io ho aldito el comito che disse: parechiè el copano s'el bisognerà per dar uno nostro in terra a Stromboli, el qual se vedeva, ma non saperia zudegar quanto era lontan; et de li ad uno puocho, atrovandome a seccar sopra el tamburlo, senti el fischeto che comandava a la banda, et salti suso et ho visto assai persone in copano, et il comito era in mezzo, et subito che la galia andò a la banda, io salti in schiffo, et non havi tempo de scapolar uno mio fratello, ma havi de gratia scampar mi; et quando fussemo circa uno tirar de man a largo de la galia el comito disse: vedemo se podemo scapolar el patron, et non so che li sia stà risposo, perchè attendeva a vogar a la volta de terra. *Interrogatus*, quanto stete la galia de sopra aqua, dapoì che ve largasti, *respondit*: Io non saperia dir *cum* verità, perchè non ho dato a mente. *Interrogatus*, el comito te ha pregato che debi dir ad uno modo più ch'a l'altro? *respondit*: El comito non m'ha parlato, circa questo, cossa alcuna, nè ho sentido che l'habia dicto ad altri; ma alcuni compagni, che non me arecordo chi siano, m'hanno dicto: Luca, sa che tu debia dire, come nui, che havemo tolto el comito d'aqua in copano; et io li promessi, et cossi ho dicto, salvo adesso che *sum* stà astretto al sacramento, che bisogna dir la verità. *Relectum confirmavit*.

*Dicto die.*

Zuam Mamoli, era balestrier *cum* la dicta, *super ultram cum* juramento examinato, *respon-*

*dit*: Per el sacramento che ho tolto dico questo haver veduto, che essendo io montato in copano, dove erano di compagni et balestrieri, la nocte che la nostra galia perite, el comito sopragiunse et montò in copano, et la galia andò a la banda et el schiffo andò in aqua, et se impite mezo el copano d'aqua, et ne fo buttà una meza barilla, *cum* la qual attendessemo a seccar; et essendo circa uno tracto d'arco a largo aviado a la volta de terra, el comito disse: saria bon che andassemo a levar el patron, et tuti resposeno: se tornemo se annegaremo tutti. El comito alhora disse: andemo a terra, chè tornerò mi solo a levar el patron.

*Interrogatus*, quanto stete la galia sopra aqua dapoì la vostra partita *cum* el copano, *respondit*: Io non posso zudegare, nè ho visto per la gran fortuna ch'era; vero è che vedevemo alcuni fuoghi, ma non sapevemo si l'era nostra o altra galia. *Interrogatus*, satu che l'comito habia dicto a vuj altri scapoladi: fradelli, non disè che jo sia montado in copano essendo in galia, ma che m'havete tolto de aqua in copano? *respondit*: Per el sacramento, che ho tolto, el comito non m'ha dicto tal parole, nè ho sentido che l'habia dicto ad altri. *Relectum confirmavit*.

*Dicto die.*

Domenego de Spalato, era compagno *cum* la dicta, *super ultram cum* juramento examinato, *respondit*: La nocte che la nostra galia se perse, io vedendo la nostra galia piegada a la banda per buttar el copano in aqua, in quello che l'schiffo andò in aqua, io salti dentro, et ho visto el comito et altri ch'erano in schiffo, el qual se impite mezo d'aqua; et quando fussemo allargadi et che voghevemo a la volta de la terra, et eremo circa uno trar de man a largo la galia, el comito disse: andemo levar el patron, et tutti risposeno: se andemo s'annegaremo tuti, et cussi andassemo a la volta de terra.

*Interrogatus*, quanto stete la galia de sopra aqua dapoì che ve largasti *cum* el copano, *respondit*: nui podevamo esser circa dui balestrade a largo, che non ho visto più nè la galia, nè fuogo, et mal se poteva veder, perchè era di nocte, scuro et fortuna. *Interrogatus*, el comito te ha pregato, over ha dicto, o pregato altri a dir che l'havemo tolto de aqua in copano? *respondit*: El comito non me ha mai dicto tal parole, nè ho aldito che l'habia dicto ad altri. L'è ben vero che alcuni compagni m'ha pregato, che debia dir che l'havemo le-